

MASCARUBA A SCORE HALTO DEN FESTIVAL INTERNACIONAL DI TEATRO NA JAPON

ORANJESTAD(AAN) -- Den un entrevista cu DIARIO tabatin cu señor Harold Pereira di Mascaruba, por a compronde cu Mascaruba a haci un tremendo papel den e festival internacional di teatro na Japon.

Mascaruba a haci asina un bon papel cu e grupo a haya entre otro invitacion pa participa na un teatro nacional na Knoxville, Merca, entre 15 y 20 di Juni 1993 caminda e 10 mihor gruponan di teatro amateur lo presenta.

E presidente di e asociacion di teatro a haya e obra cu Mascaruba a presenta asina bon



cu el a dicidi di invita e grupo pa como invitado duna un presentacion na Merca.

Ademas di e invitacion aki, Mascaruba a haya invitacion pa participa den e promer festival internacional di teatro amateur cual lo tuma lugar na luna di Juli 1993 na Korea.

Ta asina cu UNOCA a percura pa Mascaruba por a bay Japon cu un delegacion consistiendo di 12 persona. Na

Japon Mascaruba a lusi entre e otro 21 paisnan cu tambe a participa.

Mascaruba a probecha di e oportunidad na Japon pa haci e debido promocion pa Aruba. Un cantidad di flanel, folders, pechi etc., a worde parti. Hasta ta asina cu Mascaruba a worde acerca pa un grupo di estudiante di High School pa un entrevista. Ademas di promociona e isla,

Mascaruba a cera masha hopi contacto cu ta beneficioso pa e grupo.

Notable tabata cu e estudiantehan, despues di e entrevista, a presenta un exposicion di Aruba den e asina yama School Festival, caminda un cantidad di persona a asisti.

Habitantenan di e ciudadnan Toyama y Takaoba tabata haci masha hopi pregunta encunto Aruba y e delegacion di Mascaruba a duna tur e informacionnan necesario.

Loke tabata interesante pa mira tabata con e estudiantehan den e School Festival tabata duna tur clase di informacion encunto Aruba.

Recientemente Pereira a

haya e grato sorpresa cu e grupo di Mascaruba a sali ariba e portada di e revista "Journal of the Lighting Engineers Association of Japan" cu ta un revista masha conocida na Japon.

Aki por mira con un pais chikito, Aruba, a score masha haltu na e Japon caminda entre e 21 paisnan cu a participa den e festival, e representantenan di Aruba a worde escogi pa cubri e portada di e revista.

DIARIO ta felicita Mascaruba cu e gran logro aki y ta spera cu esaki ta un ehempelen con instancianan mester apoya gruponan pa nan bay promociona e isla den exterior.